

【後五百年】（科註第一〇七七頁倒數第三行）

《三藏法數》「五五百年」條：〔出華嚴經隨疏演義鈔〕

五五百年者，乃如來出世正、像、末法之年數也。謂正法一千年，像法一千年，末法一萬年。今以二千五百年，分為五者。其初二五百年，為正法之時，有修證解脫禪定之人。次二五百年，為像法之時，人雖有修行，而無證果，唯有多聞布施之者。後五百年，乃末法一萬年之初五百年也，此時之人，無修無證，但以鬥諍而為正修，以法有盛衰不同，故分此五五百年也。

〔第一五百年，解脫堅固〕，解脫即自在之義。謂諸比丘，於正法五百年中，不攻異學（異於我道之學問），唯務大乘，利益眾生，解脫自在，堅固不變也。

〔第二五百年，禪定堅固〕，謂諸比丘於正法五百年中，厭居生死，求證涅槃，頓息攀緣，深修禪定，堅固不變也。

〔第三五百年，多聞堅固〕，謂諸比丘於像法五百年中，少持戒律，怠習禪定，唯尚多聞，依語生解，堅固不變也。

〔第四五百年，塔寺堅固〕，謂諸比丘於像法五百年中，少習禪定，喜種福田，廣結善緣，多修塔寺，堅固不變也。

〔第五五百年，鬥諍堅固〕，謂諸比丘於末法五百年中，不修戒律，唯尚鬥諍，增長邪見，堅固不變也。

《佛學大辭典》「後五百年」條（節錄）：（術語）大集經所說五種五百年中，第五之五百年，鬥諍堅固之時也。